

**RM100,000 baiki jeti pendaratan ikan pari di Marudu Pitas, lima peserta dapat bantuan dana**

MUHAMMAD SHAMSUL ABD GHANI

SABAH

**K**ementerian Pertanian dan Industri Asas Tani mengemukakan peruntukan sebanyak RM100,000 bagi membaik pulih jeti pendaratan ikan pari sebagai kemudahan Persatuan Nelayan Kawasan (PNK) Marudu Pitas di Kampung Tambun Sabtu lalu.

Berita gembira itu diumumkan Menteri, Datuk Salahuddin Ayub selepas membuat lawatan bagi meninjau keperluan penduduk di kawasan berkenaan yang majoritinya bekerja nelayan.

Katanya, beliau akan sentiasa turun padang untuk meneliti keperluan nelayan, petani dan pesawah yang kini telah menjadi sebahagian daripada dirinya.

"Ketika menaiki bot dan meninjau keadaan jeti ini, dari jauh saya sudah dapat melihat keadaan jeti ini, memang ia perlu dibaiki. Insya-ALLAH, kerajaan akan sediakan RM100,000 dahulu," katanya.

Hadir sama, Timbalannya, Sim Tze Tzin dan Ketua Setiausaha Kementerian, Datuk Sallehuddin Hassan.

Jelasnya, besar harapan kementerian agar pembinaan jeti yang baharu itu akan dapat membantu memudahkan rutin harian nelayan di kawasan berkenaan.

"Apa yang penting nelayan dapat manfaat iaitu dapat mendaratkan hasil tangkapan mereka nanti. Kita umumkan juga untuk

Sinar Harian 16/7/2019 ml 5 6

# Nafas baru nelayan Kampung Tambun



Penyerahan peruntukan sebanyak RM100,00 untuk baik pulih Jeti Pendaratan Ikan Pari.

FOTO: ZAHID IZZANI

membina bagang yang berharga antara RM14,000 hingga RM15,000 untuk tujuan menangkap ikan bilis. Permohonan kita pertimbangkan melalui jabatan perikanan," katanya.

Pada majlis itu, Salahuddin turut menyampaikan Bantuan Dana Nelayan sebanyak RM25,000 kepada lima peserta perintis program penangkapan ikan pari dengan cara merawai.

"Saya sangat gembira dengan projek perintis penangkapan ikan pari ini. Saya kira projek ini mampu menyuntik perkembangan ekonomi Persatuan Nelayan Ka-



Suasana di jeti pendaratan ikan pari di Kampung Tambun Kota Marudu Pitas, Sabah.

wasan (PNK) dengan memasarkan ikan pari sekali gus menyumbang kepada pendapatan sosioekonomi nelayan dan ahli," katanya.

## Polisi baharu kurangkan kerenah birokrasi

Salahuddin ketika berucap menegaskan, beliau kini mengambil pendekatan baharu bagi memudahkan urusan para petani, nelayan dan pesawah.

Menurutnya, satu polisi untuk memudahkan semua urusan golongan berkenaan akan dilakukan.

"Kementerian akan tolong dengan syarat jangan tipu, jangan seleweng, setiap borang permohonan isi dengan betul. Anda mestilah nelayan sebenar, bukan nelayan yang hanya mengaku nelayan," katanya.

Dalam pada itu, Salahuddin

- Projek perintis penangkapan ikan pari dengan cara merawai mula dilaksanakan pada 1 April 2019 melibatkan tiga peserta dan tiga pegawai penyelia dengan suntikan modal Persatuan Nelayan Kawasan (PNK) Marudu Pitas sebanyak RM14,200
- PNK memasarkan dua spesies ikan pari di Sandakan iaitu ikan pari pasir dan ikan pari daun dengan harga memberangsangkan. Projek itu juga dilihat mampu menyuntik perkembangan ekonomi PNK
- Teknik rawai dikategorikan sebagai peralatan memancing dan boleh digunakan di Sabah. Namun, ia masih dalam peringkat kajian dari segi penggunaannya oleh Jabatan Perikanan Sabah

turut meminta orang ramai mendoakan supaya keadaan ekonomi kembali kukuh bagi membolehkan lebih banyak manfaat dapat diagihkan kepada rakyat.

Beliau juga mahu pegawai dan kakitangan kerajaan bekerja dengan telus tanpa berlaku penyelewengan supaya hasil negara dapat ditingkatkan dan keperluan nelayan ditunaikan.

Katanya, beliau ketika ini sangat komited untuk memajukan industri perikanan dan pertanian negara yang kini menjadi tanggungjawabnya.

"Jauh di lubuk hati, saya telah dapat merasakan saya kini menjadi sebahagian daripada nelayan, petani dan pesawah. Saya sentiasa berfikir bagaimana hendak meningkatkan pendapatan nelayan, petani dan pesawah. Kita perlu perjuangkan sama-sama hasrat ini," katanya.

Dalam pada itu tegasnya, selaras dengan usaha kementerian yang akan memperkenalkan dasar baharu berkaitan sektor perikanan, beliau yakin nasib para nelayan akan terbela.

Katanya, melalui dasar baharu itu, banyak perkara akan dikuatkuasakan termasuk penggunaan pukat yang tidak sewajarnya akan dihentikan dan pencerobohan nelayan asing dikawal.

"Insya-ALLAH selagi ada peruntukan yang terdapat di kementerian melalui jabatan, kami akan turunkan kepada rakyat. Hasrat kami adalah untuk memudahkan nelayan agar dapat hidup dengan lebih baik bagi menambah pendapatan keluarga," katanya.



Salahuddin (tengah) bergambar bersama warga Kampung Kota Marudu Pitas.